

Rheoliadau drafft a osodwyd gerbron Cynulliad Cenedlaethol Cymru o dan adran 61(2) o Ddeddf Lles Anifeiliaid 2006 (a pharagraff 34 o Atodlen 11 i Ddeddf Llywodraeth Cymru 2006), i'w cymeradwyo drwy benderfyniad y Cynulliad.

OFFERYNNAU STATUDOL
CYMRU DRAFFT

2014 Rhif (Cy.)

ANIFEILIAID, CYMRU

LLES ANIFEILIAID

**Rheoliadau Lles Anifeiliaid
(Adnabod Cŵn) (Cymru) 2014**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn darparu ar gyfer microsglodynnu cŵn yn orfodol fel dull o adnabod ac ar gyfer cofrestru'r microsglodyn a manylion ceidwad y ci mewn cronfa ddata.

Mae rheoliad 3 yn ei gwneud yn ofynnol i unrhyw gi bach a gaiff ei eni ar ôl i'r Rheoliadau hyn ddod i rym gael ei ficrosglodynnu cyn iddo droi'n 56 diwrnod oed neu cyn iddo gael ei drosglwyddo i geidwad newydd, pa un bynnag yw'r cynharaf.

Mae rheoliad 4 yn ei gwneud yn ofynnol i unrhyw gi y mae ei geidwad yn newid ar ôl i'r Rheoliadau hyn ddod i rym gael ei ficrosglodynnu, ac i'r ceidwad sy'n trosglwyddo ddiweddarar'r gronfa ddata y mae'r microsglodyn wedi ei gofrestru arni gyda manylion cyswllt y ceidwad newydd.

Mae rheoliad 5 yn ei gwneud yn ofynnol i bob ci llawndwf gael ei ficrosglodynnu heb fod yn hwyrach na 1 Mawrth 2015.

Mae rheoliad 6 yn ei gwneud yn ofynnol i gŵn wedi'u mewnforio gael eu microsglodynnu.

Mae rheoliad 7 yn esemptio cŵn o'r gofyniad microsglodynnu o dan y Rheoliadau hyn os yw ceidwad y ci ond yn ymweld â Chymru am gyfnod nad yw'n hwy na 30 o ddiwrnodau.

Mae rheoliad 8 yn creu gweithdrefn sy'n caniatáu i filfeddyg gael ardystio bod ci yn esempt o'r gofyniad i ficrosglodynnu ar sail ei iechyd.

Mae rheoliad 9 yn nodi pa wybodaeth y mae'n rhaid ei chofnodi mewn cronfa ddata.

Mae rheoliad 10 yn creu troseddau o fethu cydymffurfio â rheoliadau 3, 4, 5 a 6.

Mae rheoliad 11 yn darparu bod y Rheoliadau i gael eu gorfodi gan yr awdurdod lleol.

Mae rheoliad 12 yn gwneud diwygiadau canlyniadol i Rheoliadau Tocio Cynffonnau Cŵn Gwaith (Cymru) 2007.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, paratowyd Asesiad Effaith Rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi o Swyddfa'r Prif Swyddog Milfeddygol, Llywodraeth Cymru, Parc Cathays, Caerdydd CF10 3NQ.

Rheoliadau Drafft a osodwyd gerbron Cynulliad Cenedlaethol Cymru o dan adran 61(2) o Ddeddf Lles Anifeiliaid 2006 (a pharagraff 34 o Atodlen 11 i Ddeddf Llywodraeth Cymru 2006), i'w cymeradwyo drwy benderfyniad y Cynulliad.

OFFERYNNAU STATUDOL
CYMRU DRAFFT

2014 Rhif (Cy.)

ANIFEILIAID, CYMRU

LLES ANIFEILIAID

**Rheoliadau Lles Anifeiliaid
(Adnabod Cŵn) (Cymru) 2014**

Gwnaed

Yn dod i rym

6 Awst 2014

Mae Gweinidogion Cymru, sef yr awdurdod cenedlaethol priodol o ran Cymru(1), yn gwneud y Rheoliadau a ganlyn drwy arfer y pwerau a roddwyd iddynt gan adran 12 o Ddeddf Lles Anifeiliaid 2006(2).

Yn unol ag adran 12(6) o'r Ddeddf honno, mae Gweinidogion Cymru wedi ymgynghori â'r personau hynny yr ymddengys iddynt hwy eu bod yn cynrychioli'r buddiannau y mae'r Rheoliadau hyn yn ymwneud â hwynt, fel y gwelant yn briodol.

Yn unol ag adran 61(2) o'r Ddeddf honno(3), gosodwyd drafft o'r offeryn hwn gerbron Cynulliad Cenedlaethol Cymru ac fe'i cymeradwywyd ganddo drwy benderfyniad.

-
- (1) Diffinnir yr "appropriate national authority" yn adran 62(1) o Ddeddf Lles Anifeiliaid 2006. Mae'r swyddogaethau a roddwyd i Gynulliad Cenedlaethol Cymru bellach wedi eu breinio yng Ngweinidogion Cymru yn rhinwedd adran 162 o Ddeddf Llywodraeth Cymru 2006 (p. 32) a pharagraffau 30 a 32 o Atodlen 11 iddi.
- (2) 2006 p.45.
- (3) Yn rhinwedd adran 162 o Ddeddf Llywodraeth Cymru 2006 a pharagraff 34 o Atodlen 11 iddi mae'r cyfeiriad yn adran 61(2) at "House of Parliament" yn cynnwys Cynulliad Cenedlaethol Cymru.

RHAN 1

Cyflwyniad

Enwi, cymhwyso a chychwyn

1.—(1) Enw'r Rheoliadau hyn yw Rheoliadau Lles Anifeiliaid (Adnabod Cŵn) (Cymru) 2014.

(2) Mae'r Rheoliadau hyn yn gymwys o ran Cymru.

(3) Daw'r Rheoliadau hyn i rym ar 6 Awst 2014.

Dehongli

2. Yn y Rheoliadau hyn—

(1) ystyr “awdurdod lleol” (“*local authority*”) yw'r cyngor sir neu gyngor bwrdeistref sirol;

ystyr “ci bach” (“*puppy*”) yw ci sy'n llai na 6 mis oed;

ystyr “ci llawndwf” (“*adult dog*”) yw ci nad yw'n llai na 6 mis oed;

ystyr “microsglodyn” (“*microchip*”) yw dyfais adnabod amledd radio oddefol darllen yn unig—

(a) wedi ei rhaglennu â rhif unigryw y gellir ei ddarllen â sganiwr; a

(b) wedi ei chofrestru mewn cronfa ddata y mae ceidwad y ci'n credu'n rhesymol ei bod yn bodloni gofynion rheoliad 9;

ystyr “microsglodynnu” (“*microchipped*”) yw rhoi microsglodyn o dan y croen;

ystyr “milfeddyg” (“*veterinary surgeon*”) yw person sydd wedi ei gofrestru yn y gofrestr o filfeddygon o dan adran 2 o Ddeddf Milfeddygon 1966.

(2) ystyr “ceidwad” (“*keeper*”), mewn perthynas ag unrhyw gi ac eithrio ci cymorth (o fewn ystyr adran 173(1) o Ddeddf Cydraddoldeb 2010 (1)), yw'r person y mae'r ci yn preswyllo gydag ef fel arfer.

Mewn perthynas â chi cymorth, ystyr “ceidwad” yw,—

(a) hyd nes bod y ci'n peidio â gweithio fel ci cymorth, y corff sy'n gyfrifol am ei hyfforddi a'i neilltuo;

(b) ar ôl i'r ci beidio â gweithio fel ci cymorth, y person y mae'r ci yn preswyllo gydag ef fel arfer.

Adnabod cŵn bach

3.—(1) Pan fo ci llawndwf yn rhoi genedigaeth i gi bach ar ôl i'r Rheoliadau hyn ddod i rym, rhaid i

(1) 2010 p.15.

geidwad y ci llawndwf hwnnw sicrhau bod y ci bach hwnnw yn cael ei ficrosglodynnu—

- (a) cyn iddo droi'n 56 diwrnod oed; neu
- (b) cyn iddo gael ei drosglwyddo i geidwad newydd,

pa un bynnag yw'r cynharaf.

(2) Rhaid i geidwad y ci llawndwf gael ei gofrestru fel ceidwad cyntaf y ci bach yn y gronfa ddata y cofrestrir y microsglodyn arni yn unol â rheoliad 9(1)(ii).

Newid Ceidwaid

4.—(1) Ar ôl i'r Rheoliadau hyn ddod i rym, cyn i unrhyw gi gael ei drosglwyddo i geidwad newydd, rhaid i'r ceidwad sy'n trosglwyddo—

- (a) sicrhau bod y ci wedi ei ficrosglodynnu; a
- (b) rhoi enw, cyfeiriad a rhif ffôn (os oes ganddo un) y ceidwad newydd i weithredwr y gronfa ddata y mae'r microsglodyn a roddwyd yn y ci wedi ei gofrestru arni.

(2) Rhaid i'r ceidwad sy'n trosglwyddo roi'r canlynol i'r ceidwad newydd—

- (a) enw gweithredwr y gronfa ddata y mae manylion microsglodyn y ci wedi'u cofrestru arni; neu
- (b) y dystysgrif a ddyroddwyd o dan reoliad 8(1).

Adnabod Cŵn Llawndwf

5. Rhaid i geidwad unrhyw gi llawndwf sicrhau ei fod wedi ei ficrosglodynnu heb fod yn hwyrach na 1 Mawrth 2015.

Adnabod Cŵn wedi'u Mewnforio

6. Rhaid i geidwad sy'n mewnforio ci nad yw wedi ei adnabod yn unol â'r Rheoliadau hyn sicrhau ei fod yn cael ei ficrosglodynnu—

- (a) o fewn 30 o ddiwrnodau i fewnforio'r ci; neu
 - (b) cyn trosglwyddo'r ci i geidwad newydd,
- pa un bynnag yw'r cynharaf.

Esemptiad i bobl nad ydynt yn breswylwyr

7. Nid yw rheoliadau 3, 4 a 5 yn gymwys i geidwad ci sy'n ymweld â Chymru am gyfnod nad yw'n hwy na 30 o ddiwrnodau.

Esemptiad Milfeddygol

8.—(1) Nid yw rheoliadau 3, 4, 5 a 6 yn gymwys os bydd milfeddyg yn ardystio y byddai

microsglodynnu yn gwanhau iechyd ci yn sylweddol.

(2) Rhaid i ardystiad o dan baragraff (1) fod ar ffurf a gymeradwywyd gan Weinidogion Cymru.

(3) Ni chaniateir dyroddi ardystiad o dan baragraff (1) am fwy na 4 wythnos.

(4) Os yw'r milfeddyg o'r farn fod y risg o wanhau iechyd y ci'n sylweddol yn un barhaol, nid yw paragraff (3) yn gymwys.

Gofynion o ran Cronfa Ddata

9.—(1) Rhaid i geidwad gredu'n rhesymol fod gweithredwr y gronfa ddata'n cofnodi'r canlynol yn gywir—

- (i) rhif unigryw'r microsglodyn;
- (ii) enw a chyfeiriad y ceidwad;
- (iii) rhif ffôn y ceidwad, os oes ganddo un;
- (iv) enw'r ci;
- (v) brîd y ci;
- (vi) lliw'r ci;
- (vii) unrhyw nodweddion corfforol arbennig sydd gan y ci;
- (viii) rhyw'r ci; a
- (ix) dyddiad geni'r ci.

(2) Rhaid i geidwad gredu'n rhesymol fod gweithredwr y gronfa ddata—

- (i) yn diweddarar unrhyw newidiadau, y rhoddir gwybod amdanynt, i'r wybodaeth a restrir ym mharagraff (1) ar y gronfa ddata;
- (ii) yn cofnodi'r wybodaeth a restrir ym mharagraff (1) mewn cronfa ddata gyfrifiadurol ddiogel; a
- (iii) yn gallu prosesu ymholiadau am yr wybodaeth honno dros y ffôn neu ar-lein ar bob adeg resymol.

Troseddau

10. Mae'n drosedd, y gellir ei chosbi â dirwy o ddim mwy na lefel 2 ar y raddfa safonol, i—

- (a) methu cydymffurfio â rheoliad 3;
- (b) methu cydymffurfio â rheoliad 4;
- (c) methu cydymffurfio â rheoliad 5; neu
- (d) methu â chydymffurfio â rheoliad 6.

Gorfodi

11. Caiff y Rheoliadau hyn eu gorfodi gan yr awdurdod lleol.

Diwygio Rheoliadau Tocio Cynffonnau Cŵn Gwaith (Cymru) 2007

12.—(1) Mae Rheoliadau Tocio Cynffonnau Cŵn Gwaith (Cymru) 2007⁽¹⁾ wedi eu diwygio fel a ganlyn.

(2) Yn lle rheoliad 5(1) rhodder—

“(1) Er mwyn cael ei ddynodi fel ci is-adran (3) fel sy'n ofynnol gan adran 6(8) o Ddeddf Lles Anifeiliaid 2006—

- (a) rhaid i gi fod wedi ei ficrosglodynnu gan filfeddyg, neu nyrs filfeddygol o dan oruchwyliaeth milfeddyg, yn unol â rheoliad 3 o Reoliadau Lles Anifeiliaid (Adnabod Cŵn) (Cymru) 2014; a
- (b) cyn i'r ci droi'n 91 diwrnod oed, rhaid dynodi ei fod yn gi gwaith ardystiedig o dan adran 6(3) o Ddeddf Lles Anifeiliaid 2006 drwy nodi'r tociad cynffon fel nodwedd gorfforol arbennig yn y gronfa ddata y mae microsglodyn y ci wedi ei gofrestru ynddi o dan reoliad 9(1)(vii) o Reoliadau Lles Anifeiliaid (Adnabod Cŵn) (Cymru) 2014.”

Y Gweinidog Cyfoeth Naturiol a Bwyd, un o Weinidogion Cymru

Dyddiad

(1) O.S. 2007/1028 (Cy. 95).